

Cullà ne

Ci hè una cullana appesa à u to collu
L'emu chjamata risa, chì canta à basgi pettu
Hè tutta riccamata di nebbia abbraccitettu
S'o mi ne vò cusì hè per fughje u dolu...

Mi dumandu ormai cumu a chjameremu
A to funa di teghje, caminu di e notte
Chjassucci grisgiulelli duve e candillotte
Stracquavanu guadelli... parchè chì ci n'andemu ?

I to letti tetti à tardellu di sole frescu
Cullana schena bionda di misgiu silenziosu
U tempu tarlatura c'inzecca sognu rosu
Cusgitu à l'ora nuda in lu ghjornu animescu

Cullane di cridenze à empie i cestoni
Di a malincunia cù perlucce d'angogna
Una luna di gnere li lampa à l'anticogna
Ochjate di filetta è pienti à strascinoni

Si sdrughje pianu pianu nastrinu muntaninu
Chì ci sarra mimoria cun seta paisana
Hè vultatu inghjallitu cappiatu à sciappittana
Chì pare sole mortu à fiancu di destinu

Pienghjeranu funtane d'un pudè più filà
E so lane inchjustrine in e luce cinine
A so cullana in collu, e custere suligne
Chjineranu e so stese di voce à spampanà

Una cullana ci hè di case à l'adduni
Ma e creste sò mute, muntagnata s' hè zitta
Tintenne assuffucate sonanu l'ora fitta
Chì staccia tarlatana di ghjente di custì

Ci hè una cullana accinta à u to latu
Ma i grani sò vioti, à l'apertu à u ventu
Di u luciore umanu batticore s' hè spentu
Hè stancu u rimore di ricordu firmatu

